

AKASHVANI AIZAWL

REGIONAL NEWS BULLETIN

HEADLINES (EVENING)

- 1. Dampa Bial By Election campaign chuan a vawrtawp a thleng chho tan a, Political party ten theihtawp chhuahin vote an zawng mek a ni.
- 2. Lai Autonomous District Council, Intermediate District Council Court Bualpui (NG), Sub-Headquarters chu vawiin khan hawn a ni.
- 3. Bihar Assembly inthlan thawhkhatna chu vawiin khan tluang taka neih a ni.
- 4. Phillipines ah thlipui Typhoon Kalmaegi tleh avangin mi 114 an thi tawh a,mi za chuang chin hriatlohin an bo.



DAMPA CAMPAIGN

Dampa Bial By Election campaign chuan a vawrtawp a thleng chho tan a, Political party ten theihtawp chhuahin vote an zawng mek a ni.

Dampa bial By-Election atana campaign Minister Pu Lalthansanga chuan vawiin khan Dampa bial, Parvatui khua a tlawh a, thusawiin kuthnathawktuten taima taka an thawh mil a tanpuina pek leh khaichhuah chu ZPM sawrkar tum ber a ni a ti.

Kalphung tharah chuan dik taka hnalak te, thalai lekhathiam ten party bik induhsakna tel lova hna an thiamna phu tawk mila an hmuh theih nan te, Mizorama rorel tawh party dangten a thlawna pawisa sem ngawt an chin te tih ve loh an intiam avangin an sawrkar a, tun thlengin chutiang chuan ZPM sawrkar chu a la kal zel a ti a, an party candidate Pu Vanlalsailova chuan neihsumah chhuan tur nei lo mahse Pathian tanpuina hmanga a tlin ngei a rin thu a sawi.

BJP Mizoram State President Dr. K. Beichhua, MLA chuan Ailawng khua a BJP Party mite a kawm a, thusawiin Central Project-te chu state sorkar kaltlanga theh thlak ngai ni mahse a bawhzui a nawr hlawhtling tur erawh chuan Mizoram BJP an pawimawh a ti.

Central-a an hotute chuan Mizorama BJP member te thu leh hla an ngaih pawimawhzia leh an hnena mamawh an dil leh an thlen te an ngaih pawimawhsak thin zia hretute chu Mizoram mipui an ni a ti a. Mahni fate aia mi dang fate duhsak zawk tumah an awm ngai lova, chuvangin Central Project-te chu state kaltlanga an

theh thlak a ngai a, a bawhzui a nawr hlawhtling tur erawh chuan Mizoram BJP te an pawimawh ve ngei ang a ti.

State hotute chuan Mizoram mipui hriatah changtupa nih tum avanga thudik ziktluak lo sawi chu ching tawh lo se a duh thu a sawi a. Union Minister-ten an tiam angin, Dampa bial By-Election an hmachhawn mekah BJP-in sorkarna an chang a nih chuan Dampa bialah hmasawnna an beisei te a takin an hmu ngei dawn tih a sawi bawk a ni.

West Phaileng Dinthar kawn a Public Meeting a neihnaah MPCC President Pu Lal Thanzara chuan kum 2028 ah Congress an sawrkar chuan thingtlang leh khawpui a mi harsa te tan eizawnna bul an tan na turin NLUP an kalpui leh dawn tih a sawi. Dampa bial bye election lo awm tur atana tun by-election ah Pu John Rotluangliana an thlang tling a nih chuan kum 2028 ah Congress an sawrkar ngei a rin thu sawiin, Congress an sawrkar chuan thingtlang leh khawpui a mi harsa te tan eizawnna bul an tan na turin NLUP an kalpui leh dawn a ti.

Tunhnaiah BJP kaihhruai sawrkar laipui chuan Mizoram Presbyterian Synod chu income tax a thing a, Synod hotute pawh Centralah income tax lam hotute dawrin an buai hle tih sawiin, hetiang thil hi Congress kum 60 sawrkar chhungin a thleng ngai lo a ti a, Dampa bial mipuite chu Congress Candidate Pu John Rotluangliana vote turin a ngen a ni.

<><><>

CM

Mizoram Institute of Advanced Studies (MIAS) Governing Board chu an Chairman Chief Minister Pu Lalduhoma hovin Chief Minister's Conference Hall-ah an thukhawm a. Mizorama sorkar laipui enkawl research institute dinna tura kawng zawngtu leh hma latu MIAS kalzel dante thlir ho a ni a.

MIAS kalphung leh dan in phuarna hrang hrang te ennawn turin MZU Vice Chancellor hlui Prof. R. Lalthantluanga kaihhruaiin Review Committee din a ni a, he committee-ah hian MIAS Governing Board Vice Chairman leh Member Secretary-te bakah NIT, Mizoram Director leh Dr. Rohmingmawii, Associate Professor, Pachhunga University College-te an tel a.

MIAS office atan staff dah thar chungchangte, sum leh pai pek dan tur chungchangte, institution dangte nena thawhhona chungchangte sawiho a ni bawk.

MIAS hi kum 2011 khan Mizoram sorkarin a din a, Planning & Programme Implementation Department chu Nodal Department an ni.

<><><>

LADC

Lai Autonomous District Council, Intermediate District Council Court Bualpui (NG), Sub-Headquarters chu vawiin khan LADC Executive Member Pu C. Lalsawmzualan a hawng.

Pu C. Lalsawmzuala chuan Tuichhak tlang dung, Bualpui Ng leh a chhehvel, Pangkhua thlengin Intermediate District Council Court Bualpui (Ng) chu an chhawr tangkai a beisei tih sawiin, chhawr thiam a, chawi nuna, hlutthiam a pawimawh hle a ti a, Police te nena inngheng reng tur annih avangin thawhhona tha neih a ngai hle bawk dawn a ni, a ti.

Pu C. Lalsawmzuala chuan, Governor in Judicial Officer pahnih lak a phal chu alawmawm hle a ti a. LADC chu zawi zawiin a thanglian ve mek zel a ti a, mithiam neihchhoh zel hi ram leh hnam humhalhna atan thil pawimawh ber ani a ti.

Lai Autonomous District Council (LADC) - hian Court pathum a nei mek a, District Council Court te, Intermediate District Council Court te leh Village Council Court te a nei a ni. Report a alan danin, intermediate district council court hi 2010 khan neih chauh a ni. Tunah hian Intermediate District Council Court Bualpui Ng hawn tharah hian Judicial Officer atan Pu John Hlondo dah a ni.

<><><>

SOCIAL WELFARE MINISTER

Social Welfare Minister Pi Lalrinpuii’n vawiin khan hmeichhiate chung a hleilenna thleng thin tihbo kawnga hmalakna tur, Gender Based Violence Solve Project a hawng.

He project hi Aparajita leh J-PAL South Asia tangkawp hmalakna niin, Mizoramah chuan Mission Foundation Movement (MFM)-in a kalpui dawn a, vawiina hawnna hun Social Welfare Minister pisaa neih ah hian Pi Lalrinpuii chuan Mizorama hmeichhe chung a hleilenna pun nasatzia tarlangin, kum 2022-2023 chhung khan Women Helpline-ah case 3094 report a awm a, February 2025-ah chuan case 12750-ah a sang chho tih sawiin GBV tihbo lama hmalakna chu ramin a mamawh takzet tiin, hmeichhe dinhmun a that chuan chhungkua a thang a, khawtlang pawhin hma a sawn thin tih a sawi.

Minister chuan GBV Solve Project chuan hmeichhe chung a hleihlenna chungchang ringawt bitum lovin naupang (mipa leh hmeichhia) ten hemi chungchang zirtirna nasa tak an dawng dawn a ti a, hmeichhe chawmdawl ngaite eizawnna tlak khawpa thiamthil zirtirna a keng tel dawn tih a sawi.

<><><>

MNF LEGAL BOARD

Chief Minister Pu Lalduhoma’n Silsury khuaa Dampa bial by election atana a campaign-naah hnam leh hnam inkara inhuatna thlen thei thu a sawi bakah model code of conduct a bawhchhia ni a sawiin vawiin khan MNF Legal Board chu CEO hnenah an zualko.

Vawiina Aizawl Press Club ah thuthar thehdarhtute an kawmnaah MNF Legal Board Member, Pu Saihmingliana Sailo chuan tun thla November ni 1-a Chief Minister Pu Lalduhoma'n ZPM Party tana Silsury khuaa a campaign-naah MCC leh Dan dinglaite nasa takin a bawhchhia tih sawiin, Chief Minister chuan Mizoram hruaitu hmasaten Mizo mipuite leh Chakma inkarah inhuatna chi an lo tuh a, hruaitu hmasaten Chakma huat dan min lo zirtir tawh thin a ni tih a sawi a, hei bakah hian hemi ni vek hian Chief Minister chuan mipuite chu an party candidate an vote loh chuan sorkar atanga hamthatna an hmuh tur hrekah a vau bawk a ti a, hamthatna chi hrang hrangte tiamin Silsury kawng siamna tur cheng vbc 100 leh nuai 40 dah fel a nih tawh thu leh kawng tha siamsak an nih tur thu bakah, kawngpui, Border Trade, Chief Minister's Special Package, mirethei in sak tanpuina leh an mamawh dangte pek an ni dawn a ti niin a sawi sawi bawk a ni.

Heng a thu sawite hian Election Commission of India in a duan, Model Code of Conduct chiang takin a kalh a ni an ti a, MNF Legal Board chuan CEO hnenah hmala tura ngenna an thehlut tih an sawi a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

TERRITORIAL ARMY

Mizoram-a Territorial Army (Home & Hearth)-a tang tur lakna November ni 15 atanga November ni 25 inkara neih turah Mizo District hrang hrangah thlalaite ngawrh takin an training mek.

Rajiv Gandhi Stadium, Aizawl-a Territorial Army lak turah hian Pre-Recruitment Training Aizawl leh Lunglei-ah Mizoram Youth Commission leh 166 Infantry Bn (TA) (Home & Heart), Assam chuan an buatsaih mek a, ngawrh taka training niin Territorial Army atan hian post 144 General Duty lak turah post 9 chu hmechhiate tana hauhsak a ni.

State Level Committee on Territorial Army Coordination and Establishment chairman Lt. Col. Clement Lalhmingthanga chuan Territorial Army hna lak tur chu Mizoram tana mellung pawimawh tak a ni tih sawiin, Mizo thalai hmeichhia leh mipa te chu ram leilung fa an nih anga mahni ram tana thawk a, venghim tura atana ke an pen ve theihna tur kawng hawnsak chu a tum ber pakhat a ni a ti a. Territorial Army atana lakte chuan Indian Army uniform nen chhuanawm taka ram tana hnathawkin, Indian Army te angin hlawh leh hamthatna bakah damdawia inenkawlna an dawng a ti a. An hnathawh that dan leh mawmawh dan a zirin Territorial Army te chu hun rei zawk atana chhawr theih leh hamthana hrang hrang Sorkar ruahman anga pek zui zel tur an ni a. An hnathawh tur hun chhung thawk zo te chu pension leh hmathamna hrang hrang an dawng thei dawn a. Tunah hian Sorkar Laipui chu 8th Central Pay Commission hmang turin a inbuatsaih mek a, hei hian Territorial Army te hlawh leh hamthatna pawh a belhchhah dawn a ni a ti a. Mizo

thalai, hmeichhia leh mipa Territorial Army dil thei zawng zawng te chu hun tha bawhpelh lo turin a chah a ni.

<><><>

BIHAR ELECTION

Bihar Assembly inthlan thawhkhatna chu vawiin khan tluang taka neih a ni a. Hriat theih chinah tlai dar 5 thleng khan vote zaa 60 chuang a tla tawh. Tukin dar 7 atang khan Bihar assembly inthlan thawh khatna atan hian vote thlak tan a ni a, district 18 huamchhunga assembly bial 121-ah mipuiin an aiawh tur thlangin vote an thlak a ni.

Thawh khatnaah hian candidate 1314 awmin vote nei mi vbch 3 leh nuai 75 an awm a, candidate zingah hian hmeichhia 122 bakah mipa atanga hmeichhiaa inlet, transgender 1, Priti Kinnar-i te an tel a ni. Candidate langsar zual zingah JD(U) President leh Chief Minister nilai Nitish Kumar, BJP leader leh Deputy Chief Minister candidate Samrat Chaudhary, BJP leader leh Union Minister of State for Home Affairs Nityanand Rai, Lok Janshakti Party (Ram Vilas) Chief Chirag Paswan, leh VIP hotu leh Mahagathbandhan-in Deputy Chief Minister tura ruat Mukesh Sahani te an tel a.

Tangrual pawl NDA atangin JD(U)-in seat 57 an chuh a, BJP-in seat 48, LJP (Ram Vilas)-in seat 14, Rashtriya Lok Morcha-in seat 2 an chuh a ni. Eptu party tangrual pawl, Mahagath Bandhan atangin RJD-in seat 73 an chuh a, Cong-in seat 24, CPI(ML)-in bial 14 an chuh bawk a, party thar, Jan Suraj Party-in candidate 119 an nei bawk a ni.

<><><>

PHILLIPINES

Phillipines ah thlipui Typhoon Kalmaegi tleh avangin mi 114 an thi tawh a,mi za chuang chin hriatlohin an bo. Phillipine President Ferdinand Marcos Jr. chuan an ramon chhiatna a tawh avang hian rampumah state of emergency a puang a. Mitthi tam zawk hi tuilian avanga thi an ni a. mi 127 chin hriatlohin an la awm a. Cebu province chu a tuar nasa ber an ni a. Mi maktaduai 2 chuangin harsatna an tawk mek a. Mi nuai 5 leh sing 6 chuang chu hmun himah sawn chhuah tawh an ni.

<><><>